

SAC cu caso sumario

nan tin derecho exclusivo, segun Milo Croes

ORANJESTAD - Despues di a tende Minister di Husticia, Rudy Croes den e noticiero radial, Enfoke 90 cu enberdad el a duna permiso na ASOMA, Milo Croes, den su calidad di Presidente di SAC a duna di conocé cu SAC lo entamá un caso sumario.

Un caso sumario cu lo mester tuma lugar e siman aki ainda, pasobra segun Milo Croes, SAC tin den su poder e permiso exclusivo di Promé Minister Nel Oduber pa organizá tur actividad carnavalesco, cu e.o. ta encera Contest di Tumba, Calypso y Roadmarch.

Segun Milo Croes, no ta competencia di Minister Rudy Croes pa dicidí kende ta haya permiso of no. Esaki ta reglá caba cu SAC, cu tur aña ta haya un permiso general y tin exclusividad den organizacion di actividadnan carnavalesco.

Pesey Milo Croes a dicidí cu lo hiba e caso aki Corte di Husticia y ta di spera cu tur hende lo sa di respetá e veredicto, pasobra SAC ta masha

convencí di gana e caso aki. Nan tin den nan poder dicho permiso caba, mientras no por bisa esaki di ASOMA.

Minister Croes a bisa cu ASOMA lo haya e permiso, pero preto riba blanco nan no tin'é. Un caso sumario sigur interesante. Pero manera ya señalá for di ayera caba, mester tin un clash formal entre Promé Minister Nel Oduber, kende ta yerno di Milo Croes y Minister Rudy Croes, kende a primintí un permiso sin a consultá kico tin tras di e hecho cu Oduber ta autorizá pa duna permiso na SAC.

Den nos combersacion cu Minister Rudy Croes ayera, e no kier a dreña den e polémica di si tin clash cu Oduber of no.

"Mi ta Minister di Husticia y mi sa kico ta mi competencia. Mi no ta kere cu un otro hende mester bin cuestioná kico ta mi competencia si of no", e mandatario a declará na **Bon Dia Aruba**.

Loke cu a pasa ta, cu tur aña ta blo problema tin cu Carnaval. Awor despues di

40 aña a tuma decision di laga música pa e músiconan y laga e parti di Carnaval pa e fundacion SAC.

Pero, segun Minister Croes, el a condicioná e permiso na ASOMA. Esta si nan ta bai organizá tur e festivalnan, esta di tumba, calypso y roadmarch cu tur banda cu ta cai bao di ASOMA, tin cu reduci nan prijs na mitar, esta cu 50%. Ultimo aña gruponan musical a bin ta cobrando prijsnan absurdo y awor nan mester reduci nan tarifa, y na opinion di Minister Croes, pa Carnaval, sigur el a haci algo bon.

Otronan no ta pensa asina, pasobra di e forma aki, Minister Croes a kita un entrada substancial cu SAC tabata haya pa por cubri su gastonan, cu e festivalnan aki.

Pregunta cu tin awe, y loke cu huez tambe lo bin cuné, si evaluá e constante pelea entre SAC y ASOMA, pakico ASOMA no por duna SAC 50% di e ganashi di e contestnan aki?

E condicion cu Minister Croes a pone pa ASOMA, ta

un wishfull thinking. Pasobra ningun banda lo bai na reduci nan prijs cu 50%, alegando cu ta e gruponan mes a ofrecé cu di paga dicho suma, pero nin-

gun hende tey ora di negociá.

Problema tras di problema, pero esaki a bira parti di e cultura carnavalesco. □



Milo Croes, presidente di SAC, atrobe ta bira e figura mas controversial pa loke ta e temporada di Carnaval, cu oficialmente no a cuminsá ainda pero ya tur e pleitamento si a cuminsá caba.



Minister di Husticia y Deporte, Sr. Rudy Croes ta otorgá Asoma e permiso pa haci su mesun Festival di Tumba, Calypso y Roadmarch.